

Tuesday, September 30, 2025

Time - 2:30pm - 2:35pm

AKASHVANI AIZAWL
REGIONAL NEWS BULLETIN
(MIDDAY)



HANDHOLDING SCHEME

Mizoram sorkar flagship programme Bana Kaih (Handholding) Scheme Phase-I a loan component-ah dilna 11,439 a lut a, heng zinga dilna 702 hi pawm tawh niin, dilna pawm tawh zinga 181 hnenah bank-ten loan an pe tawh.

Mizoram State Policy Coordination Committee (MSPCC) hotute hnen atanga Akashvani thudawn danin, Handholding Phase-I-ah Aizawl district atangin loan component dilna 2,544 lutin a tam ber a, Aizawl district atanga dilna lut zinga 245 hi pawm niin, dilna pawm tam berna district a ni.

Handholding loan component-ah hian Champhai district-a dilna lut 1748 zinga 55 pawm a ni a; Lawngtlai district-a dilna 1687 zinga 30, Mamit district-a dilna 984 zinga 48, Lunglei district-a dilna 945 zinga 66, Siaha district-a dilna 881 zinga 34, Kolasib district-a dilna 880 zinga 74, Saitual district-a dilna 694 zinga 54, Serchhip district-a dilna 496 zinga 40, Khawzawl district-a dilna 443 zinga 33 leh Hnahthial district-a dilna lut 137 zinga 23-te pawm an ni bawh.

Bana Kaih (Handholding) Scheme Phase-I hnuaia loan component dilna pawm tawh 702 zinga 181 hnenah hian bank-ten loan an pe tawh a; MRB-in mi 135 hnenah pe tawhin, SBI-in mi 37 leh Apex Bank-in mi 9 hnenah an pe tawh a; bank 3-ten mi 181 hnena loan an pek zawng zawng hi a vaiin cheng nuai 1,236 a tling tawh a ni.



ESIC

Private hnuaia thawkte hamthatna atana Ministry of Labour and Employment hnuaia Employees State Insurance Scheme-ah Mizorama mimal sumdawnna 618-a thawktu mi 5,360 an inziaklut tawh a; ESI scheme hnuaiah hian Mizoramah a thlawna inentir theihna damdawiin 5 leh laboratory pahnih a awm mek.

ESI Dispensary hotute chuan Akashvani zawhna chhangin, ESI scheme hnuaia hamthatna dawng turin sumdawnna hmun engpawh – hotel, thingpui dawr, cinema hall, chanchinbu chhutna hmun, dawr, zirna in, damdawiin leh a dangte, mi 10 aia tlem lo hnathawktu awmnate chu an in ziahluh theih thu leh tun dinhmunah Mizorama sumdawnna hrang hranga 618 hnuaia thawktu mi 5,360 an inziahlut tawh thu an sawi.

ESI scheme hnuaia inziak lutte hamthatna hian an nupui/pasal, an fate bakah thla 1-a cheng sang 9 aia tam lo lalut an chenpui nu leh pa te a huam a; scheme hnuaia an inziahlul chhung chuan hamthatna hrang hrang - damlohna, naupai leh nauneih chungchangah te, hnathawhna avanga ramtuileilo te, hna leh thihna hial tawh thlenga hamthat bakah, pension thlenga dawn theih a ni.

ESI Dispensary hotute chuan tun dinhmunah scheme hnuaia inziaklutte hian Synod Hospital, Greenwood Hospital leh Adventist Hospital-ahte a thlawnin an hriselna dinhmun an entir theih thu leh Zoram Medical College & Hospital leh Alpha Hospital nen pawh inremna an buapui mek thu an sawi a; Trinity Diagnostic Center leh Cross Imaging Laboratory-ah pawh a thlawnin inentir theih a nih thu an sawi bawk.



COURT JUDGEMENT

Special Judge (Prevention of Corruption) chuan nimin khan Lai Autonomous District Council-a Land Revenue Department-a thawk mi pahnih chu kum khat leh thla 6 lungin tang tur leh cheng nuai 1 leh sing 1 ve ve chawi turin a hrem.

Special Judge Pu F. Rohlupaia’n LADC Revenue Department-a thawk pahnih a hrem te hi Pu T. Zairikhima leh Pu B. Hrangchhuma te an ni a, LADC a Land Revenue Department ah Circle Supervisor thawk ve ve niin Prevention of Corruption Act leh IPC hnuaia hrem a ni.

Thiamloh chantir zinga pakhat zawk Pu Zairikhima hi nimin khan Aizawl Central Jail ah dah luh nghal a ni a, hetihlai hian Pu B. Hrangchhuma chu a hrisel that loh avangin leh stroke a neih avangin Jail ah dah luh nghal a ni rihlo a ni.

LADC hnathawkte pahnih thiamloh chantir an nihna chhan a inziah danin Pu T. Zairikhima leh Pu B. Hrangchhuma te hian Kaladan Multi Modal Transit Transport Project (KMMTTP) kawng sialna tur Lawngtlai District atanga Zochachhuah paltlang turah Land Settlement Certificate (LSC) lem chu mi engemaw zah hnenah pawisa hlawhin an lo pe chhuak a, LSC lem neitu mi 120 te chu Sawrkar chawlhni Inrinni leh Pathianni ah pawh pekchhuah annih bakah dan dikloa pek anni tih hriatchhuah a ni a, LSC lem neitute erawh eirukna thilah an inhnamhnawih nia rin theih ni mahse an inhnamhnawih ngei tih chianna a awmloh avangin hrem an an ni lo a, LSC diklo tam tak an pek avang hian Pu T. Zairikhima leh Pu B. Hrangchhuma te hi thiamloh chantir an ni ta a ni.



RD MINISTER

Rural Development & Administration Department Minister Prof. Lalnilawma chuan vawiin khan thingtlang khaw hrang hranga Library sakna tur atana hmalakna ‘Establishment of New Library in Mizoram Project’ hnuaiah Library-a dah tur lehkhabute a vailiam.

Minister chuan thu sawiin he project hi SASCI hnuaia thingtlang kuate tihhmasawnna tura hmalakna pawimawh tak pakhat a nih thu a sawi a, hmun 273-a Library sak tura ruahman a nih thu sawiin Thalai leh naupang zawkten finna leh thiamna an chharchhuah theihna tura hmalakna a nih thu sawiin tunlai khawvel mila inherrem chhoh zel a pawimawh thu a sawi bawk.

A thawhkhatna atan, vawiina vailiam tak lehkhabute hi Mizoram khaw hrang hrang 69-ahte semdarh an ni dawn a ni.

